

明

通

鑑

明通鑑卷八十七

江西永甯知縣當塗夏燮編輯

紀八十七

起上章執徐盡重光  
大荒落凡二年

莊烈皇帝

崇禎十三年春正月乙丑逮湖廣巡撫方孔炤下獄先

是革左四營賊

革裡眼左金王

分屯江北豕突隨應麻黃間孔

炤駐師上游以備荊州兼顧陵寢是時京兵滇兵皆聚

西南而麻黃千里委之裨校郭金邦等賊至與戰敗績

會孔炤方奉督師檄遣副將楊世恩荆門守備羅安邦

等勦羅汝才惠登相等以深入覆軍嗣昌乃歸獄于孔

炤遂有是逮以荆南宋一鶴代之孔炤既下獄上欲寘

之法其子檢討以智伏闕訟父寃膝行沙堰者兩年上

爲心動下議以護陵寢功多得減死成紹興

攷黑楊世思羅安邦

二人以去年十二月同戰死見殉節錄又据三編質實

十二年有信陽團練守備劉煜禦賊戰死云見河南通

志真定副將王震仲擊賊將任國奇没于

閏月攷異新厯

是年閏乙酉振真定饑 戊子振京師饑民 癸卯振

山東饑 是月督師楊嗣昌檄諸道進兵時嗣昌大計

兵食規形勝之地專倚襄陽爲根本濬城外爲三濠造

機橋列橫桓以啟閉每門設一副總兵薦故推官萬元

吉委以軍事未幾左良玉合諸軍擊賊于柵坪關獻忠

敗走

張獻忠良玉進兵破張獻忠于柵坪關據明史本傳

張獻忠傳俱書之閏正月殺寇紀畧書閏正月二十

十四日蓋丙午也諸書統系之二月今分書之 召宣大總督陳新甲爲六部

尚書代傅宗龍也 二月壬子朔祀日于東郊 戊午

總兵官左良玉會總督陝西三邊侍郎鄭崇儉等大破

獻賊于太平縣之瑪瑙山先是獻忠敗走良玉請從漢

陽西鄉入蜀追之楊嗣昌謀檄崇儉率賀人龍李國奇

從西鄉入蜀而令良玉駐興安平利別遣偏將追勦良

玉不從嗣昌檄良玉曰賊勢必不能入川仍當走死秦

界耳將軍從漢陽西鄉入川萬一賊從舊路疾趨平利

仍入竹房將何以禦不則走甯昌入歸巫與羅汝才合

我以大將尾追促賊反楚非算也良玉報曰蜀地肥衍賊度險任其奔軼後難制且賊入川則有糧可因返郾則無地可掠其不復竄楚境明矣夫兵合則強分則弱今已留劉國能李萬慶守郾若再分三千人入蜀卽駐興平兵力已薄賊來能遏之邪今當出其不意疾攻之一大剗自然瓦解縱折回房竹間人烟斷絕彼從何得食況郾兵扼之于前秦撫在紫興扼之于右勢必不能逞若甯昌歸巫險且遠汝才獻忠不相下儻窮而歸汝才必內相吞其亾立見良玉已于二月朔入蜀界矣嗣昌得報語萬元吉曰良玉書詞慷慨惟敵是求將在外

不中制古也比良玉駐軍漁溪渡崇儉尋引兵來會獻  
忠聞兩道兵俱至自太平縣之大竹河移營九滾坪見  
瑪瑙山峻險據之良玉抵山下則已踞山顛乘高鼓譟  
良玉下馬周覽者久之曰吾知所以破賊矣分所進道  
爲三已當其二秦兵當其一令聞鼓聲而上兩軍夾擊  
賊陣堅不可動鏖戰久之賊大潰墜崖澗者無算俘馘  
賊渠十六人斬首千三百餘級獻忠妻妾皆被獲湖廣  
將張應元汪之鳳追犇數十里復敗之獻忠收餘衆南  
走扼于川將張令方國安又再敗令時年七十餘馬土  
用五石弩中必洞胸軍中號神弩將獻忠轉入深箐依

險結營壘令分其軍爲五鼓角薄賊而國安自他道逸  
去令獨深入被圍居絕坂屢射賊多應弦而斃水遠士  
渴賴天雨以濟圍終不解襄陽監軍僉事張克儉言于  
崇儉曰張令健將奈何棄之亟令人龍應元之鳳分道  
往援楚軍先至則令方與賊鬥呼聲動山谷應元等應  
之內外夾擊賊敗去人龍後至復與李國奇等逐獻忠  
連奏捷斬首千五百餘賊渠順天王一條龍一隻龍皆  
降獻忠竄走興歸山中當是時李自成潛伏陝右賀一  
龍賀錦等跳梁漢東勢差緩而羅汝才雖敗楊世恩羅  
安邦軍上見聞官軍大集懼討與其黨整十萬黑雲祥混

世王武自強小秦王白貴關索王承恩等遣使乞降嗣

昌佯許之獻忠屢敗于興安其黨托天王常國安金翅

鵬劉希原來降嗣昌亦受之且令常國安隨良玉進勦

獻忠勢遂孤以及于敗辰異瑪腦山之捷史稿書之戊午與綏寇紀畧及明史楊嗣昌

傳所云初七日者合明史本紀系之丙辰蓋會秦師也今據史稿日分是月湖廣張應元汪之鳳等敗賊在十

六日蜀將張令與賊戰在二十七日援兵至解圍則在三月初旬皆見綏寇紀畧而張令一大戰明史本紀不

具今據本傳 三編書之 戊寅以風蕪亢旱命廷臣直陳時政

三月甲申禱雨丙戌大風蕪上布服齋居連日禱不止

給事中左懋第言去秋星變朝停刑而夕卽滅今者不

然豈陛下有其文未修其實乎臣伏思練餉之加原非

得已乃明旨減兵以省餉天下共知之而徵餉者猶未  
省請自今因兵徵餉預使天下知應加之數官吏無所  
逞其奸以信陛下之明詔而審決刑獄則以膚慮之疑  
信定諸囚之生死凡疑于心與疑信半者悉從輕典豈  
停刑可止蕪解網不可以返風乎且陛下屢沛大恩四  
方死者猶枕藉盜賊未見衰止何也由蠲停者止一二  
存留之賦有司迫考成催徵未敢緩是以莫救于凶荒  
請于極荒州縣下詔速停有司息訟專以救荒爲務上  
曰然于是上災七十五州縣所蠲練三餉並停中災六  
十八州縣止徵練餉下災二十八州縣俟秋成督徵尋

詔清刑獄 戊子罷各鎮內臣 丙申賜魏藻德等進士及第出身有差 戊戌振畿內饑 丁未免河北三府逋賦 夏四月戊午逮江西巡撫解學龍竝黃道周下獄道周既貶江西學龍重之薦所部官推獎道周備至故事但下所司上不覆閱內閣魏照乘者素惡道周擬旨責學龍濫薦上遂發怒立削二人籍逮下吏責以黨邪亂政竝廷杖八十究黨與欲寘之死詞連編修黃文煥吏部主事陳大定工部司務董養河中書舍人文震亨竝繫獄戶部主事葉廷秀國子生涂仲吉論救亦繫獄仲吉上書通政使施邦曜不爲封進而大署其副

封曰書不必上論不可不存仲吉劾邦曜邦曜以副封  
上上見其署語怒仲吉既下獄遂奪邦曜官其秋李覺  
斯任刑部尙書讞稱學龍道周無大罪予輕比嚴旨切  
責再擬戍烟瘴上猶以爲失出除覺斯名移獄鎮撫掠  
治久之乃復還刑部反異据明史道周本傳增葉廷秀  
相識冒死論救獲重罪三編目中但已卯以謝陞爲  
書徐仲吉事今据明史傳中增入

禮部尙書陳演禮部左侍郎竝兼東閣大學士預機務  
陞再任吏部甫半載改禮部與演同入閣演庸才寡學  
工結納初入館卽與內侍通上簡用閣臣每親發策觀  
所條對能否中官探得上所欲問數事密授演演條對

獨稱旨遂擢居政府 是月左良玉進屯興安平利諸

山連營百里諸將憚山險圍而不攻初獻忠之敗走也

追且及遣其黨馬元利操重寶陷良玉曰公所部多殺

掠楊閣部猜且專無獻忠卽公滅不久矣良玉心動縱

之去至是獻忠得在興房山中與山民市鹽芻米酪收

潰散自保未幾遂走白羊山而西與羅汝才合 五月

癸未羅汝才犯夔州先是汝才及惠登相等求撫未決

遂自南漳遠安走大甯大昌參將劉貴等扼之于巫山

石碛女士司秦良玉盛兵雒門百子溪賊不得渡轉犯

夔州良玉復馳救與游擊楊茂選力戰卻之 甲申祀

地于北郊 庚戌姚明恭罷明恭出逆案趙興邦之門  
公論素不予柄用後鄉人詣闕訟之明恭不自安請告  
歸 是月改左都御史傅永淳于吏部以謝陞入閣代  
之也 六月辛亥朔總兵官孫應元賀人龍等分道逐  
賊會土司秦良玉師至復邀之馬家寨斬首六百追敗  
之留馬壩斬千餘級禽其渠東山虎又合他將連破之  
譚家坪仙寺嶺良玉奪汝才大燾禽其渠副塌天汝才  
勢衰遂走大甯當是時督師楊嗣昌以已楚人意欲驅  
賊入蜀乃建議以楚地廣衍賊難制蜀道險阻賊不得  
逞蹙之可全勝又慮蜀重兵扼險賊將毒楚調蜀精銳

萬餘爲己用蜀中卒自是益罷弱不足支巡撫邵捷春憤曰令甲失一城巡撫坐今以蜀委賊是督師殺我也爭之不能得于是賊皆窺蜀捷春駐重慶部下兵二萬多羸弱不可用所倚惟良玉張令二軍遂檄良玉令退保重慶良玉每對人嘆息曰邵公不知兵吾一婦人受國恩誼應死獨恨與邵公同死耳督師以蜀爲壑無愚智皆知之邵公不以此時爭山奪隘令賊無敢卽我而坐以設防移我與令自近去所駐重慶僅數十里殊失地利賊據歸巫山顛俯瞰我營鐵騎建瓴下張令營當其衝必先破破則及我我敗尙能救重慶急乎已而言

皆驗 庚午蔡國用卒國用入閣三載碌碌無所見至是卒于官遣行人陳際泰護其喪歸際泰以時文名天下老始成進士年六十八矣又三年除行人奉命南行卒于道 辛未薛國觀罷國觀柄政一踵溫體仁所爲導上以深刻而才智彌不及操守亦弗如上始頗信嚮之嘗燕見國觀語及朝士貪婪國觀對曰使廠衛得人安敢如是東廠太監王德化方侍側汗流沾背于是專察其陰私而國觀匿史堇金事乃發史堇者爲御史無行善結納中官巡按淮揚嘗攝巡鹽事先後乾沒賊罰銀及鹽課三十餘萬既擢少卿家居而侵盜迹頗露檢

討楊士聰劾之得旨令堃自陳遂許士聰誣已請救淮揚監督中官楊顯名覈奏尋給事中張焜芳復劾堃侵盜事實又嘗勒富人于承祖萬金事發後遣家人齎重貲謀于揚州點吏睢承吾改竄舊籍上乃怒褫堃職堃急攜數萬金入都至國觀邸求解出疏攻焜芳謂已嘗劾劉鴻訓錢龍錫其遺黨日謀報復遂相構陷又言焜芳弟炳芳官內閣中書向來詔旨漏洩皆炳芳爲之閣臣多徇堃擬嚴旨上不聽止奪焜芳官候訊及顯名覈奏上力爲堃解而不能諱者六萬金堃下獄會有兵事獄久不結瘐死堃所攜貲盡入國觀橐爲堃家人所首

告事大著國觀猶力辨上意漸移上初憂國用不足國  
觀請借助言在外羣僚臣等任之在內戚畹非獨斷不  
可因以武清侯李國瑞爲言國瑞者孝定太后兄孫上  
曾祖母家也國瑞薄庶兄國臣國臣憤詭言父貲四十  
萬臣當得其半今請助國爲軍貲上始未允因國觀言  
欲盡借所言四十萬者不應則勒期嚴追或教國瑞匿  
貲勿獻拆毀居第陳什器通衢轆之示無所有嘉定伯  
周奎與有連代爲請上怒奪國瑞爵國瑞悻死有司追  
不已戚畹皆自危因皇五子病交通宦官官妾詭云孝  
定太后已爲九蓮菩薩降神言上薄外家諸皇子盡當

歿俄皇五子卒上大恐急封國瑞七歲兒存善爲侯盡  
還所納金而追恨國觀待隙而發國觀素惡行人吳昌  
時及考選昌時虞國觀抑己因其門人以求見國觀僞  
與交驩擬第一當得吏科迨命下乃得禮部主事昌時  
大恨以爲賣已與所善東廠理刑吳道正謀發丁憂侍  
郎蔡弈琛行賄國觀事上聞之益疑至是督師楊嗣昌  
有所陳奏上令擬諭國觀乃擬旨以進上遂大怒下五  
府九卿科道議奏頗從輕議上度科道必言之獨給事  
中袁愷會議不署名且疏論吏部尙書傅永淳徇私庇  
國觀而微詆國觀藐肆妒嫉上不懌抵疏于地曰成何

糾疏遂奪國觀職放之歸怒猶未已國觀出都重車纍  
纍偵事者復以聞而東廠所遣伺國觀邸者值中書舍  
人王陞彥至執之陞彥夙與國觀交通爲奸利一鞠盡  
得其狀詞所連及甚衆永涓奕琛皆與焉命下陞彥詔  
獄窮治愷再疏盡發國觀納賄諸事國觀連疏力辨詆  
愷受昌時指使上不納 秋七月庚辰朔詔畿內捕蝗  
己丑發帑振被蝗州縣 辛卯總兵孫應元等大破羅  
汝才于興山汝才逸去與張獻忠合方獻忠走白羊山  
由汝才入甯昌故道折而西謀與汝才合獻忠雖累敗  
氣益盛立馬江岸有不前者輒斬之于是賊皆殊死鬥

蜀將劉貴等戰皆卻賊畢渡屯萬頃山歸巫大震督師  
楊嗣昌乃上夷陵而檄蜀撫邵捷春扼夔門蜀之大甯  
大昌界楚之竹溪房縣有三十二隘口嗣昌欲厚集兵  
力專守夔而棄甯昌以噉賊捷春曰棄隘口不守是延  
賊入戶也乃遣游擊楊茂選覃思岱等出關分守二將  
不相得思岱譖殺茂選捷春令兼統其眾眾相率去賊  
入隘守者潰賊夜斬夔關將士皆驚走新甯大竹旋陷  
而汝才及惠登相等越巴霧河攻開縣爲參將賀人龍  
等所破登相竄開縣西汝才乃與小秦王混世王東奔  
人龍及李國奇追之汝才等遁還興山應元偕副將王

允成王之綸監軍僉事孔貞會擊之豐邑坪大敗之斬首二千三百生禽五百有奇會嗣昌下招降令小秦王混世王皆降時稱荆楚第一功惟汝才率其衆逸走巫山仍與獻忠合于是二賊復萃蜀中 是月刑部尙書

甄淑罷淑性刻又窺上意讞獄多深文故入累爲給事中李清所論上爲謫清于外及是東廠緝其子受錢霖賄上怒下之獄以李覺斯代之 八月甲戌振江北饑戊寅發帑振真定山東河南饑 是月楊嗣昌出師入蜀嗣昌駐夷陵一月不進取華嚴第四卷謂可詛煌已旱公然下教郡邑且以上聞識者皆知其不終也是時

監軍萬元吉先入蜀令蜀將守巴巫諸隘秦將賀人龍  
李國奇楚將張應元汪之鳳張奏凱專任追擊應元等  
擊賊夔州據土地嶺而營人龍逗留不會師獻忠偵楚  
軍多新募之卒悉衆來攻應元之鳳力戰不克應元奪  
圍出之鳳敗走山中所將潘映奎沒于陣之鳳山行道  
渴飲斗水卧血凝臆死獻忠勢益張聞督師將自東至  
與羅汝才急趨觀音巖據險以守先是秦督鄭崇儉擊  
賊屢捷以年老乞骸骨上不許令率總兵鄭嘉棟還關  
中崇儉遂去至是蜀中亂嗣昌委過于崇儉以爲撤師  
太早致賊猖獗薦秦撫丁啟睿代之江北賊革左等

突英霍間上命太監盧元斌監禁兵六千馳赴河南江北合院豫兵討之擊破賊于霍山賊竄走尋陷麻城黃梅以王道直爲左都御史代傅永淳也九月官兵

敗績于觀音巖先是萬元吉駐巫山邵捷春駐大昌相爲聲援而捷春用其將邵仲光之言以大昌之上中下馬渡水淺地平難持久乃扼水寨觀音巖爲第一隘卽以仲光守之而夜義巖三黃嶺磨子巖魚河洞下涌諸處各分兵三四百人以守元吉以兵分力弱爲憂而賊突至窺上馬渡無備破之元吉急檄諸將邀之于譚家嶺七箐坎乾溪等處復遣張奏劄以專兵屯淨壁捷春

遣二將羅洪政沈應龍助之而獻忠已突淨壁趨大昌  
癸巳遂陷大昌 初李自成潛伏關中聞張獻忠反穀  
城大喜將大集其衆以應之陝督鄭崇儉圍自成令曰  
圍師必缺自成乃由缺走突武關往依獻忠獻忠欲圖  
之覺遁去會楊嗣昌督師夷陵檄令降自成出謾語官  
兵圍之于巴西魚腹山中自成大困欲自經養子雙喜  
勸而止時賊將多出降劉宗敏者藍田鍛工也最驍勇  
亦欲降自成與步入叢祠顧而嘆曰人言我當爲天子  
蓋卜之不吉斷我頭以降宗敏諾三卜三吉宗敏還殺  
其兩妻謂自成曰吾死從君矣賊黨散去者亦多殺妻

子歸自成自成乃盡焚輜重輕騎由鄖均潛入河南界  
吏部尚書傅永瀆罷以戎政尚書李日宣代之是  
月張獻忠既陷大昌謀入開縣總兵官張令扼之竹菌  
坪不克賊大至令力戰中流矢死令爲蜀中名將既敗  
沒諸軍皆奪氣秦良玉與令相犄角趨救不及轉鬥復  
敗所部三萬人畧盡乃單騎見蜀撫邵捷春曰事急矣  
盡發吾溪崗卒可得二萬我自廩其半半餼之官猶足  
辦賊捷春以倉無見糧謝其計不用良玉嘆息歸時獻  
忠屯開縣捷春聞賊且至通江率兵守梁山賊以梁山  
河深不能渡自開縣西走達州捷春退保絲州扼涪江

賊疾趨陷劍州趨保甯將由間道入漢中秦將趙光遠  
賀人龍扼之陽平百丈關賊不得過乃踰昭化復走巴  
西張應元合楚蜀兵邀之于梓潼戰小利賊返門被  
蜀將曹志耀王光啟張世福等力戰却之降將張一州  
張載福俱陷陣死萬元吉命卹其妻子涪江師遂潰賊  
屠緜州過浮橋謀趨成都嗣昌聞蜀兵潰斬邵仲光以  
徇捷春遂被逮以監軍道廖大亨代之捷春撫蜀有惠  
政其逮也成都巷哭蜀王爲引救不得卒論死及異賊陷大昌  
屯開縣明史本紀系之九月癸巳邵捷春傳書之十月  
據其被劾牽連竝記耳然據綏寇紀畧則張令戰死已  
在九月之末正入開縣界時  
也今統彙書于九月之末  
冬十月癸丑熊文燦棄

市先是文燦懼誅猶曉曉自辨以勦餉六十萬不至爲  
詞上貶督餉侍郎張伯鯨秩卒寘文燦于法議者謂李  
自成之出車箱峽張獻忠之反穀城皆坐失事機以致  
覆敗陳奇瑜及文燦皆縱賊罪首也然上雖誅文燦頗  
不謂撫議誤方楊嗣昌出師御史張肯堂言從古勘亂  
之法初起則解散勢成則剪除未有專任撫者今輔臣  
膺新命而出賊必仍用故技搖尾乞憐而失事諸臣冀  
掩從前敗局必多方熒惑仍進撫議請特申一令專務  
勦除有進招撫說者立寘重典上以偏執臆見責之于  
是嗣昌至軍不數月仍主撫復蹈文燦覆轍云 壬戌

發帑二萬製棉衣給京師貧民。是月彗星復見。

天文志十月丙戌彗星見丙戌乃十一月干支若十月有丙辰無丙戌也三編亦書之十月今據之不書日

十一月丁亥祀天于南郊。戊子南京地震。是月

楊嗣昌進軍重慶監軍萬元吉大饗將士于保甯以諸

軍進止不一請于嗣昌擢前總兵官猛如虎爲正總統

張應元副之率軍趨綿州分遣諸將屯要害而元吉自

閬道走射洪扼蓬溪以待賊賊分屯安岳界偵知官軍

至宵遁抵內江如虎簡驍騎追之元吉應元營安岳城

下以扼其歸路。十二月丁未朔嚴軍機抄傳之禁

辛亥張獻忠陷瀘州先是賊自鬆州轉掠至漢州去中

江百里守將方國安避之去賊縱掠什邡縣竹安縣殺

仁壽知縣劉三策

三編實實三策被執罵賊支解死

蹂躪德陽金堂間

所至空城而遁全蜀大震賊循水道犯簡州資陽楊嗣

昌由順慶至果州徵諸將合擊皆退縮徵左良玉兵使

者九往返不至賊遂陷榮昌永川至是入瀘州州三隅

皆形銳面江止立石站一路可北走賊既走絕地萬元

吉謀以大兵自南擣其老巢伏兵旁塞險要處蹙賊北

走永川逆擊之可以盡殲永川知縣已先遁城中止丞

簿一二人猛如虎覓鄉導不可得夜宿西關空舍及抵

立石賊已先渡南溪返走秦將賀人龍隔水不擊賊遂

越成都走漢州德陽復渡縣河走巴州瀘州之役分巡

副使黃諫卿城陷被執不屈死書記陳韶英從之僕鄭

奇陳松等五人俱殉焉

及墨陳韶英及僕五人俱據殉節錄增

知州蘇瓊

衛指揮王萬春亦死之瓊守禦不克城陷正衣冠向闕

拜泣坐堂上賊至被害閤署殉焉瓊死既久無斂者楊

嗣昌麾下卒割其首以充級聞者益切齒嗣昌矣鄉官

則故漳州知州韓洪鼎父子罵賊死生員方旭方伯元

曾薦祚亦以罵賊不屈死又有僧晞容者居瀘州之七

寶寺賊攻豹子洞晞容率鄉勇殺賊千餘相持久卒戰

死又縣州之役州貢生楊可賢者爲賊所執其子國柱

方糾眾守州城賊因挾可賢誘降可賢臨城呼其子曰

汝慎固守毋念我賊殺之其後國柱亦戰死歿異瀘州殉難官紳

皆据三編及殉節錄惟生員方旭等三人及僧歸容及綿州貢生楊可賢父子附入質實中云見四川通志殉

節錄亦入之入祠 獻忠之再入川也諸將無一邀擊士民內今据增入

者楊嗣昌雖屢檄令不行其在重慶也下令赦羅汝才

罪降則授官惟獻忠不赦禽斬者賚萬金爵通侯次日

堂皇庖福徧題斬督師來者賚白金三錢嗣昌駭愕疑

左右皆賊勒三日進兵會雨雪道斷復改期三檄賀人

龍亦不至初嗣昌以左良玉驕亢私許人龍代為平賊

將軍既而良玉有瑪瑙山之捷嗣昌難之顧謂賀將軍

需後命人龍愠以情告良玉良玉亦愠于是兩人俱跋  
扈莫肯盡力監軍萬元吉知軍心不一未可以戰請令  
前軍躡賊後軍爲繼中軍從間道出梓潼扼歸路以徐  
俟濟師爲萬全策嗣昌以賊易與不用嗣昌雖有才然  
好自用躬親簿書過于繁碎軍行必自裁進止千里待  
報坐失機會卽撫王鰲永諫之不納乃上書于朝曰嗣  
昌用師經年蕩平未奏此非謀慮之不長正由操心之  
太苦天下事總挈大綱則易獨周萬目則難况賊情瞬  
息更變今舉數千里征伐機宜盡出嗣昌一人文牒往  
返動踰旬月號令與事機相左無怪乎撓敗之屢聞也

一年以來所矜爲奇捷者惟瑪瑙一役若株守督師節制左良玉當退保興安無此捷矣然良玉不用命而反奏奇功則諸將必且有積輕督師之心所繫于軍政甚大臣以爲嗣昌之馭諸將不必人人授以機宜但覈其機宜之當否執要以御繁決奇以制勝何至久延歲月老師糜餉哉上令中樞申飭嗣昌亦不能從也 乙卯遣使逮薛國觀時國觀已罷歸而王陞彥通賄獄未成見上至是上以行賄有據命陞彥卽棄市遂逮國觀是月李自成復熾于河南自成之走河南也會河南大旱斛穀萬錢饑民從自成者數萬遂自南陽出攻宜陽殺

知縣唐啟泰轉犯永甯知縣武大烈與里居四川巡撫張論協力捍禦論沒子吏部郎中鼎延及從父治中讚繼之有獄囚勾賊入都司馬有義棄城走大烈鼎延等固守三日賊夜半登城執大烈自成以同鄉欲活之大烈不屈索印不予乃燔灼以死鼎延匿符并免讚及子國學生祚延死之主簿魏國輔教諭任維清守備王正己百戶孫世英竝不屈死萬安王采鏗郡藩在永甯亦被害賊移攻偃師一日而陷知縣徐日泰大罵不屈爲賊鬻割死諸生張敏粹率二子佐日泰守城城陷大罵俱被殺妻藺氏與三女二孫赴井死諸生武同芳見賊

殺母噴血大罵支解死諸生劉芳名劉芳世蘭之粹喬  
于昆蘭完顏王光顯喬國屏王邦紀蘭相裔張一鷺張  
一鵬牛一元皆抗節死而芳名妻張氏完顏妻張氏邦  
紀妻高氏俱從死一鷺之父亦罵賊死既又陷寶豐知  
縣朱由械死之益府鎮國將軍常澈子也陷密縣知縣  
朱敏汀宗室也與里居太僕卿魏持衡舉人馬體健竝  
死之敏汀妾張氏及一女一孫臧獲數人俱殉焉自成  
性猜忍日殺人斫足剖心爲戲所過民皆保塢堡不下  
杞縣舉人李信者故尙書精白子也信以父麗名逆案  
欲前之嘗出粟千石活饑民民德之稱李公子曾繩妓

紅娘子反攜信去強委身焉信乘閒逃歸首于官官囚之紅娘子來救饑民之德信者同時起曰李公子活我今有急不可棄乃共劫獄殺知縣反挾信歸自成自成改信名曰巖而盧氏牛金星者亦舉人也以磨勘被斥介醫生尙綱見自成喜其辯與謀議帳中潛歸事洩坐斬已得未滅仍狂奔自成遂薦所善卜者宋獻策獻策長三尺上識記曰十八子主神器自成大悅巖因說曰取天下以人心爲本請勿殺人收天下心自成從之屠僇稍滅散所掠財物餉饑民民受餉者不辨巖自成雜呼曰李公子活我巖復造謠詞曰迎闖王不納糧使兒

童歌之以相煽動民方被勦餉練餉之害從自成者日  
聚矣 刑部尚書李覺斯罷竝削籍以擬解學龍黃道  
周獄輕比也以劉澤深代之 詔增天下關稅崇禎初  
關稅每兩增一錢通崇文門河西務臨清九江潁墅揚  
州北新淮安八關增五萬兩未幾復增二錢惟臨清僅  
半而崇文門河西務俱如舊戶部尚書畢自嚴議增南  
京宣課司稅額一萬爲三萬南京戶部尚書鄭三俊以  
宣課所收落地稅無幾請稅蕪湖以抵增數自嚴遂議  
稅蕪湖三萬而宣課仍增一萬三俊悔疏爭不能己及  
是以度支日絀增關稅二十萬兩而商民交困矣 是

歲兩畿山東河南山西陝西大饑人相食詔免河北三  
府逋賦連發帑振濟令所在有司設法救荒招徠流徙  
撫按躬行州縣定殿最以聞而災荒迭告勦餉練餉之  
徵如故民皆瀕于死所練兵又不足用山西巡按御史  
陳純德請卹部民奏中極陳抽練之弊言兵抽則人失  
故居無父母妻子之依田園邱壠之戀思歸則逃逢敵  
則潰抽餘者旣以餉薄而安于無用抽去者又以遠調  
而不樂爲用伍虛而餉仍在不歸主帥則歸偏裨樂其  
逃而利其餉凡藉以營求遷秩皆是物也精神不以束  
伍而以侵餉厚餉不以養士而以求官伍虛則無人安

望其練餉糜則愈缺安望其充此今日行間大弊也意欲諷上除練餉甦民困上不能用 河南登封土寇李際遇因歲饑倡亂旬日間衆數萬前鳳陽通判姚若時居魯庄被執誘之降大罵死族諸生不顯亦死之若時子諸生城思報父讐數請兵討賊賊執之于路亦抗罵死陝州趙良棟任蓬萊教諭罷歸寓澠池寇陷澠池父子挺身罵賊死婦與孫亦赴井殉焉

十四年春正月丁丑朔張獻忠陷巴州 辛巳所穀于南郊 己丑官軍敗績于開縣獻賊遂東走先是督師楊嗣昌聞賊走巴州親統舟師下雲陽令諸將陸追賊

疾趨躡其後諸將皆疲惟總兵猛如虎一軍獨健然所將止六百騎餘皆左良玉部兵驕悍不可制又從良玉人多優閒不戰改隸如虎馳逐山谷風雪中咸怨望謠曰想殺我左鎮跑殺我猛鎮故所過惟焚掠無鬥志時賀人龍兵已大譟回陝所恃止如虎萬元吉深憂之至是賊自巴州折而東轉入開縣官軍追之及于黃陵城與賊遇時日晡雨作諸將請詰朝戰參將劉士杰者素勇敢善戰獨前奮曰四旬逐賊今始及之舍而不擊縱使軼去我不能也掇甲而先如虎激諸軍竝進士杰所當輒摧陷賊大披靡獻忠登高望見我師無秦人旗幟

而左兵亦攜阻不前士杰孤軍跳盪後無繼者乃密抽壯騎潛行箐谷中乘高大呼馳下左兵先潰士杰及游擊郭開如虎子先捷竝戰死如虎率親兵力戰中軍馬智挾如虎上馬潰圍出旗纛軍符盡失嗣昌在雲陽聞敗乃悟諸將盡躡賊後塵一旦東返歸路盡空不可復制頓足曰悔不用萬監軍言而是時賊已疾趨出夔門抵興山攻當陽犯荆門嗣昌至夷陵檄良玉兵使十九返良玉撤興房兵趨漢中若相避然賊所至燒廬舍殺塘卒東西消息中斷丙申李自成陷河南初河南大旱蝗人相食民間藉藉謂先帝耗天下肥福王洛陽富

于大內援兵過洛者喧言王府金錢山積而令吾輩枵  
腹死賊手南京兵部尙書呂維祺方僑居洛陽聞之懼  
以利害告福王常洵力勸其散財餉士不從維祺乃盡  
出私財設局振濟及自成連陷永甯宜陽參政王蔭昌  
率衆至洛陽警備總兵官王紹禹副將劉見義羅泰各  
引兵至而賊已抵城下王始出千金募勇士出城擊賊  
賊稍却夜半紹禹親軍從城上呼賊相笑語尋作亂縛  
蔭昌紹禹馳諭之不聽揮刀殺守堞者燒城樓開北門  
納賊維祺方分守北城遂被執有識之者曰子非振饑  
呂尙書乎我能活爾維祺不應乃反接之去王縋城出

匿迎恩寺賊跡而執之遇維祺于道維祺呼曰王綱常至重等死耳毋屈膝于賊王瞠不語見賊渠于周公席按維祺使跪不屈延頸就刃死賊殺王勺其血禱鹿肉以食曰福祿酒兩承奉伏王尸哭賊粹之去承奉呼曰王死某不願生願乞一棺收王首齋粉無所恨賊義而

許之桐棺一寸載以斷車兩人卽其旁自縊死

攷異此据明史

諸王傳及三編而兩承奉佚其姓名据綏寇紀畧內執事承奉劉顯典膳錢福門正李彰雲等三十六人外執事者堂官焦如星良醫張鳴臯杜一經等十一人皆死又云鄒妃世子得脫走河北世子繼妃李氏福王選侍孟氏蕭氏李氏皆自經附識于此蔭昌及知府亢孟檜通判白守文皆

死之

攷異据綏寇紀畧有訓導張道脈又言亢官武職共九人佚其姓名

鄉官自呂尙書

而下故昌樂知縣劉芳奕家居歲大祲傾橐以濟賊逼  
河南集義士爲干城社佐有司保障城陷縊死西城戍  
樓故平陽推官常克念故翰林待詔郭顯星故邯鄲知  
縣韓金聲故行人王明故辰州知府楊萃皆抗節死舉  
人來秉衡荀良翰皆未仕秉衡爲賊將劉宗敏所執令  
易服欲官之不可羈之南郊民舍顧謂其友曰賊勒我  
以官我義不受辱惟母老子幼不瞑目耳賊聞燒鐵索  
加其頸終不從遂殺之竝其母劉氏妾吳氏及幼子俱  
被殺良翰亦死諸生黃調鼎福王世子由崧妻弟也護  
由崧匿安國寺夜半乘間奪門出由崧體肥碩不能行

調鼎負之北走抵苗家溝賊追者且及調鼎力憊不能  
支忽道旁得由崧素所乘馬遂扶掖上疾驅渡河以免  
王妃鄒氏亦得脫俱走懷慶賊發王邸金振饑民火其  
宮三日不絕事聞上震悼輟朝三日令河南有司改殯  
福王賜謚曰恭逮紹禹至京師磔于市 是月李自成  
過汝州陷之汝爲流賊往來孔道士寇又竊據山中知  
州錢祚徵募壯士千人夜半入其巢寇大敗乃令民千  
家立一大寨自保寇勢衰息其魁遂降至是自成驟來  
犯祥徵乘城守身中流矢守益力月餘大風薶礮作樓  
焚城遂陷罵賊而死汝人立廟祀之 二月己酉詔以

時事多艱災異疊見痛自刻責停今歲行刑諸犯俱減  
等論 庚戌張獻忠陷襄陽楊嗣昌以襄陽爲軍府繕  
守具陳利兵譏訶出入必以符驗然是時河南北大饑  
流民就食襄漢者日數萬又使招降諸賊旣得免死牌  
莫肯散自擇便利連營數百里監軍僉事張克儉深憂  
之上書嗣昌曰襄陽自古要區今筦鑰獻陵眎昔尤重  
近兩河饑民雲集新舊降丁逼處其間一夫叫呼卽足  
致亂嗣昌恃城濠之固不以爲意報曰監軍何怯邪及  
獻忠出川鄖撫袁繼咸統所部兵邀擊獻忠不得逞乃  
留羅汝才綴鄖兵自率輕騎一日夜馳三百里殺督師

使者于道取軍符夜叩襄陽城門克儉不能察賊黨劉興秀等二十八騎遂入夜半從中起焚襄王府居民望見火以爲滿城皆賊奪門出城潰克儉倉皇奔救爲賊所執大罵死推官鄺曰廣同妻子女皆遇害攝縣事李大覺繫印于肘自縊堂上游擊黎民安力戰矢盡被縛大罵死初獻忠敗于瑪瑙山其妻妾敖氏高氏被獲他將搜山又獲其軍師潘獨鰲皆繫襄陽獄知府王承曾年少而佻每夕託問賊中情形與二氏相笑語獄吏又多納賊金禁防盡弛獨鰲脫桎梏恣飲嗣昌移牒戒之承曾笑曰賊豈能飛至邪至是賊爭毀狴戶擊二氏與

獨熬出承曾乘夜走遲明賊大至索知府不得執襄王

翊銘于南城樓屬卮酒曰吾欲借王頭使嗣昌以陷藩

伏法王其努力盡此酒遂與從子貴陽王常法同遇害

火城樓焚其尸賊去僅拾顛骨數寸蘭陽王母徐氏

王翊銘卽常法父也太和王妃邸氏宮人李氏等凡死者四十三

人惟福清王常澄進賢王常淦常澄襄王子常淦亦蘭陽王子也走免

事聞上震悼命所司備王禮葬謚曰忠是役也嗣昌所

積五省餉金弓刀火藥數十萬及守兵數千人皆歸賊

時兩藩連陷洛陽國帑而襄陽軍資闔獻遂不可復制

矣王子獻忠陷樊城尋陷當陽破郟縣殺知縣邵可灼

生員王敬臣佐有司殺賊力竭赴水死子裔昌從之

戊午李自成攻開封不克時自成乘勝入汴豫撫李仙風方慰唁福世子于河北巡按御史高名衡集衆登陴周王恭枵發庫金百萬兩募死士殺賊蒸米屑麥執爨以餉軍凡七晝夜仙風馳還開封副將陳永福背城而戰斬首二千游擊高謙夾擊復斬首七百賊解圍怒而去遂屠密縣時保定總督楊文岳遣總兵虎大威副將張德昌先率五千人援開封比渡河圍已解乃會仙風于偃師以兵少未敢擊賊待文岳軍至與賊戰于鳴臯鎮大破之賊遂東走 乙丑張獻忠陷光州獻忠破襄

陽東下遂合羅汝才之兵入河南尋攻商城時知縣盛以恒方遷開封同知將行賊奄至士民懇留乃登陴與鄉官楊所修洪允衡馬剛中段增輝拒守會雨雪守者凍餒不能戰以恒督家衆射賊十七人墜馬賊怒并力攻矢中以恒右額猶裏剗禦賊賊破北門入家衆巷戰死且盡乃被執罵賊不屈爲賊支解其孫覺殉之所修等四人及典史呂維顯教諭曹維政皆死所修故左副都御史龔逆案贖徒爲民至是罵賊死允衡歷官陽和兵備副使分守北門力戰死剛中故大同知縣行取檢討乞假歸賊入大罵被磔死增輝除教授未謁選歸遇

變罵賊死諸生盧紹德黃焯陳廷對陳廷璋鄭光啟劉  
澤長楊士琦皆以捍賊死賊遂疾馳犯信陽城陷知州  
高孝誌訓導李逢旭程所聞及里居靜海知縣張映宿  
布衣張士傑等死之士傑年十八賊欲殺其父求以身  
代賊殺之而舍其父又陷光山典史魏光遠亦死之于  
時羅山息縣固始皆被殘破 己巳召閣臣九卿科道  
于乾清宮左室以陷雒藩戕親叔自譴命駙馬都尉冉  
興讓等齎帑金振恤河南被難宗室 三月丙子朔楊  
嗣昌卒嗣昌在夷陵聞襄陽陷驚悸上疏請死至荊州  
朝于惠王謝不見令謁者傳語曰先生惠顧寡人願先

之襄陽謂襄陽之破罪在嗣昌也嗣昌慚且恚復聞洛陽已于正月先陷福王遇害益憂懼語萬元吉曰何面目見上以後事付元吉服毒死時御史張肯堂以嗣昌督師無狀上言流寇隳城破邑往來縱橫如入無人之境目前大計宜亟罷嗣昌疏甫上而元吉上死狀之奏至矣河南巡撫袁繼咸巡按高名衡以嗣昌自裁聞上甚嗟悼之顧以廷臣方交章論列不得已下九卿議罪侍郎蔣德璟曰嗣昌倡聚斂之議加勦餉練餉致天下民窮財盡胥走爲盜又匿失事飾首功宜按仇鸞事追正其罪乃會諸大臣議請坐失陷城塞律斬當僇屍上

傳諭曰故輔嗣昌奉命督勦無城守專責且臨戎二載屢奏捷功盡瘁隨身勤勞難泯特命昭雪嗣昌罪賜祭歸其喪于夷陵和事熊汝霖爭之言楊嗣昌不罪盧象昇未褒殊挫天下忠義之氣且言爲嗣昌畫策練餉驅中原萬姓爲盜者給事中沈迅也爲嗣昌運籌以三千人駐襄陽城破輒走者監紀主事余爵也爲嗣昌援引遭襄藩之陷重賂陳新甲嫁禍卽撫袁繼咸者今解任候代之宋一鶴也皆誤國之臣宜罪不聽 乙酉禱雨 丙申薊遼總督洪承疇會八鎮兵于甯遠去年秋大清兵圍錦州克城西九臺小凌河西岸二臺總督洪

承疇遣兵援之敗于黃土臺及松山杏山至是總兵祖  
大壽數出戰不利連章告急詔承疇及巡撫邱民仰帥  
宣府楊國柱大同王樸密雲唐通合曹變蛟白廣恩馬  
科吳三桂王廷臣八總兵軍十三萬馬四萬竝集甯遠  
先是松杏之敗洪承疇請解總兵劉肇基任代以王廷  
臣遣左光先西歸代以白廣恩又請十三萬之兵須芻  
糧足支一歲然後可議益兵詔所司速措給之 丁酉  
逮陝西三邊總督鄭崇儉下獄上始終眷楊嗣昌因懣  
崇儉前在蜀撤兵早不與嗣昌犄角平賊逮至卒論死  
是月張獻忠分兵犯茶山應城遂攻隨州州嘗被賊

居民素然知州徐世溱預度賊必復至集士民誓以死守會歲大禱士多就食粥厥世溱嘆曰可使士以餒失禮乎出粟振之潰兵過隨索餉世溱單騎入見軍帥曰軍食不供有司罪也殺我足矣請械我以見督師帥不能奪歛衆去比賊來犯世溱寢食南城譙樓曉夜固守告急于巡撫宋一鶴一鶴遣兵來援爲監司守承天者邀之去守月餘援盡力窮賊急攻南城而潛兵墮其北城以入世溱命子肇梁薤印廨後勒馬巷戰矢貫頤耳鼻橫斷墜馬亂刀斫死肇梁奔赴且哭且罵賊將殺之呼州人告以薤印所乃死世溱妾趙氏王氏及臧獲十

八人皆從死隨自十年七月陷及是再陷至七月復陷  
判官余塙死焉三陷之後城中幾無孑遺云攷異此在  
獻賊陷光

州商城之後明史本傳特書于是年之三月其七月  
復陷及余塙之死並見傳中諸書不載今彙書之

夏四月壬子

大清兵攻錦州距城三十里而營又分兵扼松杏援師  
之路時總兵祖大壽堅守不敢戰遣卒自城中逸出請  
援且戒援兵毋輕戰結車營以拒是時洪承疇方次甯  
遠俟餉未發遣兵護輜重于松山杏山已未以總督  
三邊侍郎丁啟睿爲兵部尙書督師節制陝西河南四  
川湖廣江北諸軍故督師楊嗣昌薦也啟睿本不知兵

爲督撫時奉督師期會無功過及擢督師任重不知所爲受命出潼關將由承天赴荊州湖廣巡按汪承詔言大寇俱集河南荆襄幸息警無煩大軍盡匿漢津船啟睿至五日不得渡折而向鄧州州人閉門詬過內鄉長吏懼其擾亦不納軍行荒山間割馬羸燎以野草土啗不飽啟睿聞自成方圍開封有衆七十萬不敢援張獻忠在光山固始間少弱乃謀于諸將曰上命我勦豫賊此亦豫賊也遂檄左良玉破之于麻城斬首千三百開封日告急則曰我方有事于獻忠不及也五月庚辰范復粹罷復粹代薛國觀爲首輔上召見廷臣語及福

王泣下復粹曰此乃天數上曰雖氣數亦賴人事挽回  
復粹不能對尋致仕去 釋前兵部尙書傅宗龍于獄  
命以兵部侍郎總督陝西三邊軍務專討李自成代丁  
啟睿也時啟睿奉督師命仍督三邊軍務而啟睿畏自  
成不敢擊初楊嗣昌死尙書陳新甲薦宗龍才上初不  
應旣而曰宗龍樸忠吾以夙負任之宜盡死力至是釋  
之命討賊而啟睿聞宗龍爲秦督遂乞改敕書令宗龍  
專勦自成宗龍旣至陝與陝撫汪喬年議括關中兵餉  
以出而屬郡旱蝗已不能應宗龍握喬年手欷歔而別  
戊子祀地于北郊 壬辰以錦州被圍召廷臣議軍

事時尙書陳新甲請分四道進兵洪承疇以兵力弱議往返不決乃遣職方郎中張若麒赴軍前就承疇議之是月李自成分兵犯南陽劇賊百餘人冒雨薄城知府顏日愉擊殺之幾盡餘賊乃退城獲全日愉手中一矢頭項被二刃死賊旣不得志去乃縱掠旁近州縣

張獻忠僞張左良玉旗幟入泌陽陷之知縣王自昌罵賊死再攻應山不克去六月兩畿山東河南浙江湖廣旱蝗山東盜起時兩畿及各省連歲告災土賊蠶起給事中詹兆恒言燕齊二千里間寇盜縱橫行旅阻絕四方餉金滯中途者至數百萬請急發京兵勦滅楚

豫之疆盡青燐白骨新徵舊逋斷無從出乞多方蠲貸  
上並采納給事中左懋第督催漕運道中馳疏言臣自  
靜海抵臨清見人民饑死者三疫死者三爲盜者四米  
石銀二十四兩人死取以食臣自魚臺至南陽流寇殺  
戮村市爲墟其他饑疫死者屍積水涯河爲不流振捄  
安可不速臣有事河干一載每進父老問疾苦皆言練  
餉之害三年來農怨于野商嘆于途如此重派所練何  
兵其效安在奈何使衆心瓦解一至此極乎又言臣抵  
宿遷見督漕臣史可法言及所在穀直翔貴河南石米  
至百五十兩漕儲多逋朝議不收折色需本色今淮鳳

間麥大熟如收兩地折色易麥轉輸于漕運大便上卽命議行而是時山東盜李青山方熾運道爲梗 秋七

月己卯羅汝才與張獻忠不合走內鄉浙川合兵于李自成犯鄧州保定總督楊文岳率總兵官虎大威擊之戰三捷斬首七百餘級馘其渠二人賊遁去 壬寅洪

承疇援錦州先是張若麒詣軍中見諸鎮兵大集團可立解密奏上聞而陳新甲復貽書趣進兵承疇不得已乃與邱民仰曹變蛟統兵救錦是日駐師松山 是月

臨清運河水涸時運道自棗林牖溯師家莊頻年患淤淺遭歲大旱東平平陰肥城諸泉漸塞南旺湖淤臨清

河遂涸總督侍郎張國維言南旺水本地脊惟藉泰安  
新泰萊蕪甯陽汶上東平平陰肥城八州縣泉源由汶  
入運故運河得通今東平平陰肥城淤沙中斷請亟濬  
之報可時京師大疫詔設局給醫藥 張獻忠自應山  
攻鄖陽按察使高斗樞遣游擊王光恩及弟光興分扼  
之戰屢捷賊不敢犯光恩者均州降渠小秦王也斗樞  
察其誠招入鄖共城守斗樞善謀光恩善戰鄖城危而  
獲全賊去鄖陽尋陷鄖西 八月乙巳宣府總兵官楊  
國柱敗績死之先是承疇自松山議進兵國柱請先進  
大清兵四面呼降國柱方陷伏中太息謂其下曰此吾

兄子振昔年殉難處也

楊振死難見十二年十月

吾獨爲降將軍乎

奮勇格鬥中矢死承疇以山西總兵李輔明代之令與山海總兵馬科等分營松山東西北三面曹變蛟營松山之北乳峯山之西間列七營環以長濠躬自督兵據松山城爲久拒計而是時杏山之餉不至塔山護餉之兵復敗于筆架岡間

太宗親統大軍將至利在速戰乃盡檄七營步兵背松

山城而陣

阪異三編松山杏山之捷統書于七月日中言七月二十八日壬寅明兵次松山越三日

甲辰楊國柱先進敗沒按新厝甲辰爲八月初一日蓋目中漏去八月二字也今仍据明史本紀書于八月乙

巳 辛亥賜薛國觀死國觀被逮遷延久不至上月始

入都令待命外邸不以屬吏國觀自度必不死至是日  
又監刑者至門猶鼾睡及聞詔使皆緋衣蹶然曰吾死  
矣倉皇覓小帽不得取蒼頭帽覆之宣詔畢頓首不能  
出聲但言吳昌時殺我乃就縊 辛酉重建太學成上  
親詣學釋奠于先師孔子 癸亥

大清兵陳師于松山杏山間先是

太宗親率大兵利在速戰晝夜兼程疾馳六日至環松  
山而營時八鎮軍欲戰則力不支欲守則餉道已絕甲  
子夜大同總兵王樸先遁總兵馬科李輔明及甯遠總  
兵吳三桂密雲總兵唐通遼東總兵白廣恩相繼走諸

鎮兵皆潰

大清遣兵邀之塔山丙寅樸三桂率殘卒自杏山遁遇  
大清兵于高橋伏四起盡殲其衆二人僅以身免是役  
也承疇所統士卒十三萬先後失亡五萬餘人自是錦  
州圍益急而松山被圍外援亦絕 是月總兵左良玉  
敗張獻忠于信陽獻忠旣拔鄖西羣盜附者萬計遂東  
肆掠自瑪瑙山之敗獻忠心畏良玉及是屢破郡縣雖  
小挫于麻城未與遂有驕色再攻信陽良玉躡及之與  
大戰斬其渠沙甲奪馬萬餘匹降賊數萬獻忠傷股乘  
夜東奔良玉急追之會大雨五晝夜江溢道絕官軍不

能進獻忠走免已復出商城將向英山又爲副將王允成所破衆散且盡所從止數十騎時羅汝才已先與自成合獻忠遂投自成自成欲以部曲遇之獻忠不從自成欲殺之汝才曰不如留之使擾漢南分官軍兵力陰與獻忠五百騎曰急東走此非若所當留也因遁去道糾土賊一斗穀瓦礫子等勢復盛汝才卽賊中所稱曹操者少與自成同里閏汝才年長弟畜之後以穀城之役與獻忠爲唇齒獻忠浸陵折之舍之去遂投自成于鄧州請改事爲兄及獻忠敗于鄖陽其前茅八哨之兵無所歸自成又邀而取之附者日益衆有豫土寇號小

亥者名時中方窺鳳泗爲京軍及劉良佐之兵所敗乘風雨渡河其衆尙二十餘萬往投自成故是時自成之疆他寇皆不及也。九月丁丑陝西總督傅宗龍帥師次新蔡與保定總督楊文岳會師討李自成宗龍率秦兵賀人龍李國奇將之文岳率保兵虎大威將之共結浮橋東渡汝合兵趨項城自成羅汝才亦結浮橋于上流將趨汝甯己卯自成覘兩督兵至盡伏精銳于林中陽驅諸賊自浮橋西渡人龍使後騎覘賊還報曰賊向汝矣結浮橋將渡矣宗龍文岳會諸將兵竝進中途一騎馳而告曰賊畢渡矣或又告曰三分渡其二矣宗龍

文岳曰驅之走三十里至孟家庄人龍大威曰馬力乏矣詰朝而戰止兵爲營諸軍皆弛馬甲植戈鋌散行墟落求芻牧賊覘之塵起于林中伏甲竝出搏官軍人龍有馬千騎不出國奇麾下兵迎擊之不勝秦兵保兵俱潰人龍大威奔沈邱國奇從之三帥師皆潰宗龍文岳合兵屯火燒店賊以步兵攻其營諸軍燃大礮震死賊百餘賊引去宗龍軍西北文岳軍東南畫塹而守文岳兵宵潰其部將挾文岳騎而馳夜駐項城尋奔陳州宗龍復率秦兵立營于東南諸將分壁當賊壘尋檄人龍國奇還兵救二帥不應宗龍曰彼避死宜不來吾豈避

死哉語其戲下曰宗龍老矣今日陷賊中當與諸軍決一死戰不能效他人卷甲走也召裨將李本實穿塹築壘以拒賊賊亦穿濠二重以圍之未幾食盡宗龍殺馬羸以餉軍既盡殺賊取其屍分噉之守八日矢石俱盡宗龍簡士卒夷傷之餘有衆六千夜半潛勒諸軍突賊營殺千餘人潰圍出諸軍星散宗龍徒步率諸軍戰且走未至頂城八里賊追及之執宗龍呼于門曰啟門納秦督宗龍大呼曰我秦督也不幸墮賊手今左右皆賊耳賊唾宗龍宗龍罵賊曰我大臣也殺則殺耳豈能爲賊賺城以緩死哉賊抽刀擊宗龍中其腦而仆斷其耳

鼻死城下人龍國奇兵潰皆歸陝 甲申召周延儒賀  
逢聖復入閣初延儒里居頗從東林遊善姚希孟羅喻  
義既陷錢謙益遂讐東材入主會試所取士張溥馬世  
奇等又皆東林也歸後失勢心內慙而體仁益橫比體  
仁去後張至發薛國觀相繼當國與楊嗣昌等竝以媚  
嫉稱一時正人若劉宗周鄭三俊黃道周等皆得罪溥  
等憂之說延儒曰公若再相易前轍可重得賢聲延儒  
以爲然溥友吳昌時爲交關近侍逆案中舊輔馮銓復  
助爲謀會上亦頗思舊臣而國觀適敗因與賀逢聖復  
召入閣溥等要以數事延儒慨然曰吾當銳意行之以

謝諸公既入朝悉反體仁畫弊政首請釋漕糧白糧欠戶蠲民間積逋凡遭兵荒諸州縣減見年兩稅蘇松常嘉湖諸府大水許以明年夏麥代漕糧召還言事遷謫諸臣李清等上皆忻然從其請尊禮之特重明年歲旦朝會上進延儒等而揖之曰朕以天下聽先生然延儒實庸駑無材畧且性貪門下客盛順董廷獻因緣爲奸利給事中章正宸因言陛下隆禮閣臣願閣臣積誠以格君心毋緣中官毋修恩怨毋以寵利居成功毋以爵祿私親暱語皆風刺延儒延儒不悅 辛卯封皇子慈炯爲王先是上諭禮臣曰朕第三子慈炯年已十齡敬

遵祖制宜加王號但既受冊封必具冕服而會典開載  
年十二十五始行冠禮十齡受封加冠二禮竝行可乎  
于是禮臣厯考典故參稽經傳以奏乃冊封爲定王選  
新進士爲檢討國子助教等官爲待詔充講讀官以中  
書舍人充侍書仍俟至十二歲始行冠禮 壬辰賊屠  
項城及商水扶溝 戊戌李自成羅汝才陷葉縣副將  
劉國能方守葉國能爲盜時與自成汝才等約爲兄弟  
及國能歸正自成等深恨之圍其城四面力攻國能不  
能支城遂陷被執賊猶好謂之曰若我故人也何不降  
國能瞋目罵曰我初與若爲賊今則王臣也何故降賊

遂殺之知縣張我翼亦死上聞項城葉相繼陷宗龍敗  
沒嘆曰若宗龍可謂撲忠矣贈官賜祭葬予謚忠壯國  
能亦贈卹如制尋擢秦撫汪喬年爲兵部右侍郎代宗  
龍趣出關討賊時關中精銳盡沒于項城喬年曰兵疲  
糧乏當方張之寇吾出如以肉餵虎耳然不可不一出  
以持中原心乃收散亡調邊卒得馬步三萬人率賀人  
龍等出關 是月張獻忠復合于革左諸賊趨英霍間  
官軍擊敗于英山之望雲寨 起侍郎劉宗周爲吏部  
左侍郎時吏左缺廷推不稱旨臨朝而嘆謂宗周清正  
敢言遂以命之宗周于道中進三劄曰明聖學以端治

本躬聖學以建治要重聖學以需治化凡數千言優詔  
答之 冬十月癸卯朔日有食之 戊辰遣中官劉元  
斌盧九德率京營兵與總兵官周遇吉黃得功合援河  
南元斌駐歸德留四旬不進 十一月丙子李自成陷  
南陽初參議艾毓初分守南陽賊至與知府顏日愉禦  
却之至是自成用其軍師宋獻策計欲取南陽以圖關  
中復率大衆來犯總兵猛如虎從楊嗣昌下荊州詔移  
駐南陽因與毓初堅守賊攻入南門會總督楊文岳援  
軍至賊引退文岳去賊復攻之如虎馮城戰殺賊數千  
食盡援絕城乃陷如虎猶短兵大呼衝擊血盈袍袖北

面叩頭謝自稱力竭遂遇害唐王聿鎮被殺聿鎮者聿  
鍵弟也毓初題詩城樓自縊死知縣姚運熙主簿門迎  
恩教諭李獻吉訓導楊氣開俱死之又有副總兵劉光

祚自頂城來唐王邀與共守城陷亦死之

祚與光祚佐守南陽死事

見明史猛如虎增傳中而三編所記南陽殉難諸臣獨  
遺之蓋三編据明史忠義傳而傳中以光祚見增傳故  
不具三編目中因失賊遂縱兵覆所屬州縣攻陷鄧州  
藏耳今据本傳增

知州劉振世吏目李國璽千戶余承蔭李錫諸生丁一

統張五美王鍾王子章海寬傅彥皆抗節死鎮平知縣

鍾其碩典史杜日秦南召知縣尙用光內鄉知縣龔新

新野知縣韓醕主簿江朝瀛典史惠永貞皆殉城死泌

陽知縣姚昌祚代王自昌

自昌見上

甫蒞任泌陽再陷昌祚

手斬數賊力屈與主簿熊天倫典史雷晉暹武職王衍  
范錢繼功海成俱死之昌祚子在紳兄子在鈞皆同殉  
天倫亦全家死焉舞陽知縣潘宏聞賊將至集士民拒  
守諸生慮賊屠城請委曲紓禍宏叱之去賊薄城發礮  
擊之多斃有小校善射屢却賊諸生潛遣人約降賊復  
至宏作告先聖文自誓必死諸生潛開門縛宏以獻賊  
索印宏不予脅降怒罵不屈乃支解之子澄瀾痛憤大  
哭投井死舞陽諸生陳豫抱母段氏早寡撫豫抱及其  
弟豫養豫懷皆爲諸生至是城陷母先赴井三子從之

豫抱妻黃攜其子默通豫養妻馬攜子默恒默言俱從  
之三世九人同時殉節唐縣許曰琮避居南山賊徵之  
不出脅以死鑄其背曰誓不從賊遂嘔血死內鄉許宣  
及二弟案官聞賊陷鄧州兄弟結里中壯士直入其城  
禽僞官堅守內鄉之許家寨賊怒攻破之案從母常氏  
先投井死宣官皆罍賊被殺官妻鍾案妻陳竝自經其  
妹亦罵賊被殺時稱許氏七烈云 十二月甲子前江  
西巡撫解學龍少詹事黃道周謫戍是年秋決刑部尙  
書劉澤深等言二人罪至永戍止矣過此惟論死論死  
非封疆則貪酷未有以建言者道周無封疆貪酷之罪

而有建言蒙慘之名于道周得矣非我聖主覆載之量也夫陛下所疑者黨耳黨者見諸行事道周抗疏祇託空言一二知交相從罷斥烏覩所謂黨而煩朝廷大法乎且陛下豈有積恨于道周萬一聖意轉圜而臣已論定悔之何及仍以原擬請乃謫戍廣西是月李自成乘勝將復窺開封連陷其所屬許州禹州陳留通許尉氏洧川鄆陵臨潁長葛新鄭汜水十餘城于是許州知州王應翼與其子國及都司張守正舉人魏完真諸生李光閏李文鵬王應鵬皆死之陳留典史邵大濟訓導楊道升同殉城死鄉官劉文耀方擢鞏縣教諭未任以

事赴開封道于陳留遂還家遇賊罵不屈與子福穎俱  
死之通許知縣費曾謀甫蒞任四旬賊猝至抱印投井  
死尉氏知縣楊一鵬蒞任數月政聲四起城破罵賊死  
洧川知縣柴薦禔亦死之鄆陵知縣劉振之方賊至有  
奸人素通賊倡言鄆陵城小宜速降振之怒叱退之典  
史杜邦舉曰城存與存城亡與亡公言是也振之乃與  
集吏民共守賊大至城陷振之秉笏坐堂上賊索印不  
予縛置雪中三日夜罵不絕口亂刃交下乃死邦舉被  
執自成欲降之罵曰朝廷臣子豈爲賊用賊抉其舌含  
血噴之遂遇害臨穎千總賈蔭序長葛教諭歐陽植典

史杜復春舉人孟良屏諸生張範孔新鄭知縣劉孔輝  
汜水舉人張治載馬德茂等俱死難禹州故有徽王府  
嘉靖時王載埏有罪爵除其支屬延津郡王等皆在禹  
僉事李乘雲駐焉賊寇州城乘雲誓死固守賊多斃于  
礮俄以十萬衆攀堞登執乘雲使跪乘雲怒叱賊賊捥  
而杖之大罵不絕聲縛諸樹攢射之罵不已斷其舌亂  
刃交下而死延津郡王等同遇害商水再陷前後知縣  
王化行姚文衡鄉官張質皆死之賊遂攻開封巡撫高  
名衡總兵陳永福駐兵城中開封周邸所在圖書文物  
之盛甲他藩自成必欲得之乃大集其衆再圍之名衡

等力拒賊而永福射自成中目礮殪其渠數人自成益怒自成每攻城不用古梯衝法專取瓴甌得一甌卽歸營卧後者必斬取甌已卽穿穴穴成初僅容一人漸至百十人次第傳土以出過三五步留一土柱繫以巨絙穿畢萬人曳絙一呼而柱折城崩矣名衡于城上鑿橫道聽其下有聲用毒穢灌之多死賊乃卽城壞處用火攻法實蒞甕中火燃蒞發當者輒糜碎名曰放进攻久之城半圯賊用放迸法以攻鐵騎數千馳譟伺城頽卽擁入城故宋汴都金南遷時所重築也厚數丈土堅火外擊賊騎多殲自成始駭而去 是歲張獻忠自四川

突湖廣亦擾河南及信陽之敗窮竄而之江北江北賊賀一龍左金王等據英霍二山相爲聲援而河南北土賊袁時中李際遇陝西土賊竇開遠等亦復大熾所在官民被害者甚衆其可紀者應天則援勦副將戴國柱率兵援淮徐與賊戰于徐州力屈死參將張寶山守桐城戰輒有功擊賊于魯瑛山中伏死參將古道行擊袁時中于睢甯之雙溝没于陣英山知縣高在崙冒矢石擊賊多死者賊來益衆被執不屈死潛山知縣李孕嘉典史沈所安同殉城死徐州鄉官故順天京衛經歷滕九萇沛縣布衣張鳳世霍山布衣宋貞及吳時道張大

翼胡懷信時際順俱遇害河南則汝州指揮錢繼美吏

目朱任卿百戶梁翰成諸生王暘布衣朱續川

攷異三編目中

有汝州知州錢祚徵已据明史本傳系之正月而正月汝州之役乃李自成所犯而祚徵傳所載無指揮錢繼美等同殉之事疑前後事非同時也三編目中亦据是年死事之人彙書之故其日月多不具云

魯山

舉人袁象斗陳州指揮孫紹武與其子璉登封知縣鄆廷誨靈寶知縣朱挺指揮許佳允伊陽訓導任中蛟俱先後死先是賊寇陝西則淳化諸生葛竹溪環縣諸生曹天心四川則巴州同知張連曜德陽知縣龔之安墊江知縣荆偉成都鄉官周敏中等湖廣則興山典史張達益陽貢生潘若洙弟若鴻諸生溫昆來鍾鳴謙等竝

先後殉節而總兵賀人龍子大明擊賊于靈寶山中石  
阡推官余士泰上計次襄陽亦皆死于賊云皆異以上  
而三編多据明史忠義傳其錢皆括三編  
祚徵余靖二人已見前故不具